

## **Намоздан кейинги зикр ва тасбех**



21:12 / 08.11.2017 22653

4543. Абу Зарр розияллоху анҳудан ривоят қилинади:

**«Расулуллоҳ соллаллоҳу алайҳи васаллам:**

**«Ким Бомдод намозидан кейин оёғини йиққан ҳолида туриб, гапирмасдан олдин ўн марта «Лаа илааҳа иллаллоҳу, вахдаҳу лаа шарийка лаҳу, лаҳул мулку ва лаҳул ҳамду, юҳий ва юмийту ва ҳува ѭала кулли шайин қодийр» деса, унга ўн ҳасанот ёзилур, унинг ўн хатоси ўчирилур, унинг ўн даражаси кўтарилур. Ўша куни у барча ёқимсиз нарсалардан ҳимояда бўлур ва шайтондан сақланур. Ўша куни уни гуноҳ ҳам тутмас, магар Аллоҳ таолога ширк келтирмаган бўлса», дедилар».**

**Шарҳ:** Дуонинг маъноси: «Аллоҳдан ўзга илоҳ йўқ, Унинг Ўзи ёлғиздир, Унинг шериги йўқдир, мулк ва ҳамд Унгадир, тирилтирур ва ўлдирур, ва У ҳамма нарсага қодирдир».

Деярли кўпчилик машойихлар ва ўтган азизлар ушбу ривоятда келган дуони ўзларига кундалик вазифа қилиб олганлар. Ҳар бир киши бунга амал қилмоғи лозим. Чунки Бомдод намозидан кейин ўрнидан турмай, оёқлари йиғилган ҳолда, дунёвий гапларни гапирмай туриб бу дуони ўқиган одамга кўпгина яхшиликлар ваъда қилинмоқда:

1. Унга ўн ҳасанот ёзилур.
2. Унинг ўн хатоси ўчирилур.
3. Унинг ўн даражаси кўтарилиур.
4. Ўша куни у барча ёқимсиз нарсадан ҳимояда бўлур.
5. Шайтондан сақланур.
6. Ўша куни уни гуноҳ ҳам тутмас, магар Аллоҳ таолога ширк келтиргмаган бўлса. Агар Аллоҳ таолога ширк келтирган бўлса, иши чатоқ бўлади.

Бу ҳадиси шарифга амал қилишни йўлга қўйиш керак.

4544. Умора ибн Шубайб ас-Сабаъий розияллоҳу анҳудан ривоят қилинади:

**«Набий соллаллоҳу алайҳи васаллам:**

**«Ким Шомдан кейин ўн марта «Лаа илааҳа иллаллоҳу, вахдаҳу лаа шарийка лаҳу, лаҳул мулку ва лаҳул ҳамду, юҳий ва юмийту ва ҳува ѭала кулли шайн қодийр» деса, Аллоҳ уни тонг отгунча шайтондан муҳофаза қиласидиган силоҳланган фариштани юборади. Аллоҳ унга бу ила вожиб бўлган ўн ҳасанот ёзадир, унинг ўнта ҳалок қилувчи хатосини ўчирадир ва бу унинг учун ўнта озод қилинган қул баробарида бўлур», дедилар».**

Иккисини Термизий ривоят қилган.

**Шарҳ:** Бу зикр Шом намозини ўқиб бўлгандан кейин ва дунёвий гап гапирмасдан туриб бўлиши керак.

4545. Абдуллоҳ ибн Амр розияллоҳу анҳумодан ривоят қилинади:

**«Набий соллаллоҳу алайҳи васаллам:**

**«Икки хислат ёки одат бор. Мусулмон банда уларни муҳофаза қиласа, албатта жаннатга киради. Иккиси осондир ва уларга амал қиласидиган оздир. Ҳар бир намоздан кейин ўн марта тасбех айтади, ўн марта Аллоҳга ҳамд айтади ва ўн марта такбир айтади. Ўша ҳаммаси тилда бир юз элликта. Тарозида бир минг беш юзта.**

**Қачон ётар жойини олса, ўттиз тўрт марта такбир, ўттиз уч марта ҳамд ва ўттиз уч марта тасбех айтади. Булар тилда юзта, тарозида**

**мингта. Батаҳқиқ, Расууллоҳ соллаллоҳу алайҳи васалламнинг уларни қўллари билан санаётганларини кўрдим. Шунда:**

**«Эй Аллоҳнинг Расули! Уларнинг осон бўлгани ва уларга амал қиласиган оз бўлиши қандай?» дейишди.**

**«Шайтон бирингизга уйқусида келади ва уни айтишидан олдин ухлатиб қўяди. Намозида келиб, уни айтишидан олдин ҳожатини эсига солади», дедилар».**

«Сунан» эгалари ривоят қилганлар.

**Шарҳ:** Ҳадиси шарифдаги «Ҳар бир намоздан кейин ўн марта тасбех айтади, ўн марта Аллоҳга ҳамд айтади ва ўн марта такбир айтади. Ўша ҳаммаси тилда бир юз элликта» дейилганда беш вақт намоз кўзда тутилган.

Бу ерда намоздан кейин ва ухлашдан олдин тасбех, ҳамд ва такбир айтишнинг яна бир услуби ҳақида сўз кетмоқда. Уйқуга кетишдан олдин ўттиз тўрт марта такбир, ўттиз уч марта ҳамд ва ўттиз уч марта тасбех айтиб ётишга амал қилиб борилса, катта хайр, баракага эга бўлинади.

Бизда намоздан кейин айтиладиган тасбех, ҳамд ва такбирда бошқа ҳадиси шарифга амал қилиб келинмоқда.

*Имом Муслим ва Термизийлар Каъб ибн Ужра розияллоҳу анҳудан ривоят қиласидилар:*

**«Расууллоҳ соллаллоҳу алайҳи васаллам:**

**«(Намоз) ортидан келувчиларни айтувчилар ёки қилувчилар ноумид бўлмаслар. Ҳар бир намоз ортидан ўттиз учта тасбех, ўттиз учта ҳамд ва ўттиз тўртта такбир», дедилар».**

**Ушбу ҳадисда зикр қилинган ҳар бир намоз ортидан ўттиз уч марта «Субҳаналлоҳ», ўттиз уч марта «Алҳамду лиллаҳ», ўттиз тўрт марта «Аллоҳу акбар»ни зикр қилиш кейинги ривоятларда келадиган зикрлар ила уйғунлашиб, татбиққа кирган.**

*Имом Муслимнинг ривоятида:*

**«Ким ҳар намоздан кейин ўттиз уч марта Аллоҳга тасбех айтса, ўттиз уч марта Аллоҳга ҳамд айтса, ўттиз уч марта «Аллоҳу акбар» деса,**

**ҳаммаси түқсон түққиз бўлур, юзтанинг тамом бўлиши - «Лаа илааҳа  
иллаллоҳу вахдаҳу лаа шарийка лаҳу, лаҳул мулку ва лаҳул ҳамду  
ва ҳува ъала кулли шайин қодийр»ни айтса, унинг гуноҳлари денгиз  
кўпиклари каби кўп бўлса ҳам мағфират қилинур», дейилган.**

Имом Муслимнинг ривоятига аввал ёки охирида «Оятал Курсий»ни қўшиб  
ўқиши сўфийлар жорий қилганлар. Бу сўфийлар хатми деб номланади. Бу  
нур устига нур дейилади, чунки «Оятал Курсий» Куръони Каримдаги энг  
улуғ оятдир. Ушбу хатмни қилиш бизда ҳам жорий бўлиб келаётган  
нарсадир.

***Шайх Муҳаммад Содик Муҳаммад Юсуф***

*(Ҳадис ва ҳаёт китобидан)*